

Ki te tirohia te ahua o te Hahi i etahi o nga tau kua pahure atu nei, ka kitea te tohu o ta te Atua atawhai kua piri mai inaianei. I era tau he nui te haurangi waipiro i nga huihuinga katoa o te tangata maori; i tenei wa ia kua iti ki etahi wahi, kua kore rawa ki etahi. Ko nga tangata kua whakawaia e nga karakia ke, kua boki mai etahi, ko etahi kua ahua rata mai, kua kore e whakakino mai ki a tatou karakia, kua pai mai ki nga Minita o te Hahi kia tae atu ki a ratou. He mea ano enei e whakawhetai ai tatou ki te Atua, e whakaputa ai hoki i te uaua ki te whakahoki mai ki nga huarahi tawhito i nga mea kua kotiti ke.

Tetahi mea e taea ai tenei, ko te whakatikatika i nga mea e hapa ana i roto i a tatou. I te mea ka tangi te pere karakia, he tokomaha e ngakaukore ana ki te whakarite. He tokomaha nga tangata o te kainga, he ruarua noa iho te hunga e tae ana ki te karakia. I te mea hoki ka tae, he tokomaha e kore e tu ki runga, i nga wahi i tika ai te tu, o kore e tuturi i nga wahi i tika ai te tuturi: me te mea e kiia ana te karakia he mea whakarite kau noa iho. Engari kia ngahau te mahi i tenei mahi, me te whai ano ki nga taonga, e homai nei e te Atua, kia riro mai i a tatou, kia kitea ai e te hunga o waho, he tino mahi ano tenei na tatou. Tetahi mea i raruraru ai te karakia, ko te kore whare motuhake hei whare karakia. Karakia noa ai i roto i nga whare moenga; takoto wharoro ai etahi i te wa ano o te karakia; mutu tonu iho te karakia, e puhipuhi ana i te tupeka, kahore he hopohopo.

Ko te Ratapu ano tetahi, kia ata whakaaroa e te tangata. Kua whakaritea nei tenei e te Atua hei ra e watea ai te tangata ki te karakia, ki te mahi i nga mea o te taha ki te wairua, ehara i te mea tika kia whakawarea tatou, i taua ra, e nga mahi huhua o to ao. Tetahi mahi nui mo taua ra ko te whakaako i nga tamariki ki nga tino mea o te Rongopai. Kei te puta te whakaaro o etahi o nga kai-whakaako o nga kura a te Kawanatanga ki tenei mahi, he mea aroha noa na ratou. Te hunga ia nana te mahi, ko nga matua, nana ake nei nga tamariki, ko nga matua-atua hoki; e whakamaharatia nei ratou ki tenei e te karakia mo te Iriiri tamariki.

Te mate o etahi wahi, he kore minita. Ko nga pariha kua whai Tahua hei oranga mo te minita, kei te mahara tonu te Pihopa; ka whakaritea hoki he minita mo reira i te mea ka kitea e ia he tangata e tau ana mo tenei mahi. Otira e kore e ahei kia whakaritea he minita mo te wahi kahore nei ona Tahua Oranga Minita. Hei te tangata maori he minita tuturu mo te Hahi Maori: koia i whakaritea ai hei Te Raukahikatea he Kareti, e kura ai te tangata mo tenei mahi. I puta ra te kupu a te Pihopa, i te Hui ki Manutukea, i a Maehe ka taha ake nei, kia whai-whakaaro nga tangata o te Hahi ki te whakatupu i